

Акафист святой равноапостольной Марии Магдалине

Празднование 4 августа (22 июля)

Кондак 1

Уготованная Господом к равноапостольному служению, святая Марие Магдалино, возлюбленному ти Христу последовала еси; темже песньми с любовью восхваляем тя: ты же, яко имущая дерзновение велико Господу, от всяких нас бед молитвами твоими избави, да с радостию непрестанно зовем ти:

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Икос 1

Ангелов Творец и Господь сил, предуведевый благое произволение твое, святая мироносице, от града Магдалы избра ты, свободив от диавольския сети: ты же по сих верная служительница Господеви явилася еси, ревнующи о прославлении Его житием и служением. Мы же, чудящися таковому о тебе Божию смотрению, во умилении сердец зовем ти:

Радуйся, от Сына Божия из тьмы диавольския в чудный свет Его призванная; Радуйся, того благодатию телом и духом до конца чиста пребывшая. Радуйся, с чистотою сердца и нищету духовную до конца сохранившая; Радуйся, первее всех воскресшаго Христа узрети сподобившаяся. Радуйся, силу вражию добре победившая; Радуйся, крепкою верою и теплою любовью ко Христу Богу просиявшая. Радуйся, всем сердцем Спаса Христа

возлюбившая; Радуйся, верно тому даже до смерти послужившая. Радуйся, душою твоею благодатно обновившаяся; Радуйся, проповедь Евангелия в сокровище сердца своего вместившая. Радуйся, проповедь Воскресения апостолом возвестившая; Радуйся, ангельскою беседою почтенная.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 2

Видящи святая Мария себе от седми лютых бесов избавление, всем сердцем победителю ада Христу Богу прилепися, вся люди научающи не усты токмо, но и всем житием Богу служити, вопиющи Тому: Аллилуиа.

Икос 2

Разум человеческий недоумевае, помышляя, из каковыя беды на высоту ангелоподобнаго жития благодатию Христовою возшла еси, достохвальная Марие Магдалино. Темже и мы, добрую ты предстательницу имуще, молимся тебе тепле: избави и нас от бездны греховныя, да любовию вопием ти таковая:

Радуйся, лютаго демонскаго рабства избегшая; Радуйся, лесть лукавых бесов яве обличившая. Радуйся, в напасти вражией ко Христу Богу прибегати всех научившая; Радуйся, никомуже отчаяватися в велицей греховней скорби побуждающая. Радуйся, ко святости всем грешником путь показавшая; Радуйся, всемогущую силу благодати Христовы познавшая. Радуйся, достойнаго

Богу благодарения добрая наставнице; Радуйся, истиннаго богохваления верная учительнице. Радуйся, в житии твоём правый путь земнаго течения нам показавшая; Радуйся, всем грешником пред Богом благая заступнице. Радуйся, душ наших от лести сатанинския защитнице; Радуйся, во всякой скорби теплая ко Христу наша ходатаице.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 3

Силою божественных благодати, купно же и своим благим произволением безпечально оставила еси дом отца твоего, якоже древле Авраам, и радостно последовала еси Христу Богу: темже молим тя, ученице Христова, славная Марие, молитвами твоими и наша сердца просвети любовью к Богу, да и ныне и присно взываем Тому: Аллилуиа.

Икос 3

Имуще богодарованную ти премудрости силу, мужески отвергла еси, Марие Магдалино, сего мира красная, и яко ученица добрая, премногим милосердием обнищавшему за ны Слову истинно послужила еси. Сего ради и мы со умилением вопием ти:

Радуйся, добрая Христова ученице; Радуйся, истинная любве к Богу наставнице. Радуйся, суету мира сего добре познавшая; Радуйся, мужески его радости отвергшая. Радуйся, красная мира ни во чтоже вменившая; Радуйся, чину иноческому добрый путь жития предпоказавшая. Радуйся, всех ко Христу

Богу путеводствующая; Радуйся, для дел милосердия из дому земнаго изшедшая. Радуйся, Христово милосердие zde и на небеси обретшая; Радуйся, яко тем блаженства вечнаго достигшая. Радуйся, мудрая агнице, от злых волков к доброму пастырю Христу прибегшая; Радуйся, во двор словесных овец его вшедшая.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 4

Буря бесовския ярости превеликою силою устремися на храм души твоея, святая Марие, но того поколебати до конца не возможе: обрела бо еси спасение на твердем веры Христовы камени, на немже ты, мудрая жено, недвижимо стоящи, учиши всех всеблагодару Богу воспевати песнь: Аллилуиа.

Икос 4

Слышаще, богомудрая Марие, яко в последовании Христу обрела еси истинное веселие сердца, правду, мир и радость о Дусе Святе, тщимся и мы явитися в лице причастник сего Царства Божия. Тебе же, яко причастнице того сущей и путь нам к нему показавшей, рцем вси таковая:

Радуйся, небесную Иисусову сладость возлюбившая; Радуйся, жизнь истинную во Христе обретшая. Радуйся, тояжде образ и нам верно показавшая; Радуйся, в радости небесней ныне присно живущая. Радуйся, райския снеди непрестанно вкушающая; Радуйся, огонь любви к Богу в сердце твоём возжегшая. Радуйся, Христом Богом, яко раба ему

верная, возлюбленная; Радуйся, прилежная о нас к Богу молитвеннице. Радуйся, в бедах наших помощнице; Радуйся, наша благая и кроткая учительнице. Радуйся, Духа Святаго пречестное жилище.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 5

Боготечная звезда спутствующи Христу, славная Марие, посреде мироносиц явилася еси. С ними же ныне непрестанно предстоящи святей Троице, и нас молитвами твоими к священному тех лику совокупи, путь темный жития нашего светом твоим озаряючи, да радостно возопием Богу: Аллилуиа.

Икос 5

Видящи, святая Марие, Христа Бога на кресте висяща, дивное мужество показала еси: мнози бо от ученик Учителя своего оставивша: ты же, непрестанными божественными ученьми Того душу и мысль разжегши, немощь естества женскаго превозмогла еси, и тако причастилася еси спасительней Христовой страсти. Сего ради мы, сицевое твое доблественное мужество зряще, вопием ти:

Радуйся, мудрых жен красото и удобрение; Радуйся, христиан всех доброе радование. Радуйся, Христу Богу, на кресте висяшу, сострадавшая; Радуйся, непоколебимей любви к тому нам путь показавшая. Радуйся, сицевою любовью в предстательстве о нас к Богу дерзновение велие обретшая; Радуйся, женам

доброто и похваление. Радуйся, христианом крепкое прибежище; Радуйся, паче сильных мужей крепчайшая. Радуйся, мудрецов мира сего мудрейшая; Радуйся, яко тебе тайная премудрости своя Бог явил есть. Радуйся, яко тебе истинному богословию Сам Бог Слово научил есть; Радуйся, Христа Бога паче жизни своя возлюбившая.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 6

Благодатию Твоею немощная врачуеши и некрепкия сосуды тверды соделоваеши, Христе Царю. Мироносицы бо жены у креста твоего мужески предстоят и благодать крестную всем небоязненно возвещают: лица же мудрых жен, ликам ангельским уподобитися тщащесе, бодренно непрестанно зывают Троице Святей: Аллилуиа.

Икос 6

Взыскующе озаритися светом истиннаго богоразумия, егда Бога на кресте висяща видела еси, глаголала еси слезящи, дивная Марие: како Жизнь смерть вольную ныне приемлет? Мы же, славное просвещение твое благодатию Святаго Духа ведуще, вопием ти сицевая:

Радуйся, Христа распята от глубины души оплакавшая; Радуйся, веселие вечное в селениих небесных обретшая. Радуйся, нам образ добраго плача показавшая; Радуйся, яко ты еси наше непрестанное радование. Радуйся, всех скорбящих утешение неложное; Радуйся, яко Христу, Его ради,

на земли спострадала еси. Радуйся, яко с Ним о Нем на небеси прославляешия; Радуйся, всех врагов наших крепкая победительнице. Радуйся, во всех скорбех наших скорая помощнице; Радуйся, яко всем христианом воспоминание твое пресладко. Радуйся, яко всей Церкви Христовой имя твое пречестно; Радуйся, истинная лозо винограда Христова.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 7

Хотящи уразумети креста всепобедительную силу, до конца Христовой страсти предстояла еси у креста Спасова со иными женами, преславная Марие. Матери же Господни болезненно состраждущи, тако недоуменно вопияла еси: что сие есть странное чудо; содержи всю тварь пострадати изволи. Мы же на живоносный крест волею вознесшемуся любовию вопием: Аллилуиа.

Икос 7

Дивная жена явилася еси, блаженная Марие, любовию твоею ко Христу Богу: тую бо горестными изъявляя рыданьми, ко снятому со креста припадаючи, слезами пречистыя язвы Его омыла еси. Еще же благообразному Иосифу и правдолюбивому Никодиму последующи, ко гробу Спасову со иными святыми женами текла еси, ово плачущи, ово плачущую неутешно Матерь Его Пренепорочную, Ейже душу лютое оружие пройде, утешаючи. Мы же, такову твою доблесть ведуще, смиренно взываем ти:

Радуйся, пречистыя язвы Христовы слезами омывшая; Радуйся, Матери Того Пренепорочней яве сострадавшая. Радуйся, Христа даже до гроба неоставившая; Радуйся, во гроб полагавшуюся Жизнь недоуменно зревшая. Радуйся, слезам покаяния наша добрая учительнице; Радуйся, теми слезами греховныя скверны омывати нас наставляющая. Радуйся, теми же сердце наше окамененное умягчати побуждающая; Радуйся, образ истинной мудрости нам показавшая. Радуйся, памятовати выну страсти Христовы нас научающая; Радуйся, славная Марие, купно с пренепорочною Девкою Мариею, наша верная ходатаице. Радуйся, добрая слуга Христова; Радуйся, Господеви, а не человеком угождавшая.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 8

Странно, богомудрая Марие, явися тебе погребение всем жизнь подающаго Жизнодавца: Того любовию уязвляема, еще сущей тьме, ко гробу Его принесла еси миро и слезныя пролила еси ароматы. Темже и пребываеши ныне во благовонных рая селениих со ангельскими лики зывающи непрестанно Богу: Аллилуиа.

Икос 8

Весь сладость, весь радость, весь жизнь тебе бысть Иисус, святая Марие: Того ради, видевши камень взят от гроба. Сего же не обретши, рыдаючи текла еси к живому веры камени Симону и другому, егоже любляще Иисус, ученику, болезненно глаголющи

има: взяша Господа от гроба и не вем, где положиша Его. Ныне же ты, свободившись от скорби тоя, со Христом вечно радуешься на небеси. Мы же на земли в таковую радость молитвами твоими внити чающе, со умилением вопием ти тако:

Радуйся, сиянием любви твоей ко Христу тьму ночную победившая; Радуйся, нощному бдению в молитве нас научившая. Радуйся, светом вечным на небеси осиянная; Радуйся, и нищетою духовною Царство Небесное купившая; Радуйся, яко по скорби о страстях Христовых обрела еси обильное утешение; Радуйся, жено кроткая, наследнице земли небеснаго рая. Радуйся, алкавшая и жаждавшая правды Христовы, яко ты ныне насыщаешься трапезы небесныя; Радуйся, милостивая, милость Владыки обретшая, и о нашем помиловании того усердно просящая. Радуйся, ты бо ныне, яко чистая сердцем, Бога лицом к лицу зриши; Радуйся, яко сподобилася еси первее всех видети Воскресение Христа, вечнаго мира. Радуйся, изгнанная правды ради Христовы, яко твое есть Царство Божие; Радуйся, приобретшая вечное веселие и мзду многу на небесех.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 9

Всяк чин ангельский удивися великой тайне славнаго Воскресения Твоего, Христе Царю, ад же притрепетен бысть, видев, яко снишел еси в преисподная земли и сокрушил еси верей вечныя, содержащия связанныя, Христе. Мы же радости жен

мироносиц сорадующеся, с веселием вопием:
Аллилуиа.

Икос 9

Ветий многовещанных языки не довлеют достойно изрещи великую скорбь твою, славная Марие, егда стояла еси вне гроба плачущи. Кто бо возможет рещи болезнь души твоея, егда не обрела еси во гробе паче жизни своея возлюбленнаго ти Господа; прискорбное сердце твое не возможе внимати утешению ангелов светлых. Сицевую скорбь твою со умилением воспоминающе, воспеваем ти таковая:

Радуйся, видети Христа Иисуса в пещеру проникшая; Радуйся, ныне того на Престоле Славы сидяща зрящая; Радуйся, светлых небожителей еще сущи на земли узревшая; Радуйся, от тех глас радости Воскресения Христова приемшая. Радуйся, яко ты с ними ныне присно радуешися; Радуйся, любовью миро Христу принесшая. Радуйся, во благоухающую мира Христова воню сладце притекшая; Радуйся, отвергшая радостей мира греховнаго горечь. Радуйся, возлюбившая небесную Иисусову сладость; Радуйся, добрая леторасле сада Иисусова. Радуйся, благоплодная лозо вертограда Божия; Радуйся, преукрашенный Храм Духа Всесвятаго явльшаяся.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 10

Спасти хотя мир, аще и во гроб снишел еси бессмертне, но адову разрушил еси силу и воскресл

еси, яко победитель, Христе Боже, женам мироносицам вещавый: Радуйтесь. С ними же и мы ныне песнь радости приносим ти: Аллилуиа.

Икос 10

Стены каменные твердее бысть любовь твоя к возлюбльшему тя Христу, мироносице славная Магдалине Марие. Темже едина видела еси прежде инех Живота нашего из гроба возставша: вертоградаря же того нещевала еси быти и вопияла еси тому, забывши естества немощь: аще ты еси взял Его, повеждь ми, где еси положил Его, и аз возму Его. Но сладостный того глас показа ти Учителя, нас же глашати научи тебе сице:

Радуйся, истиннаго Вертоградаря воскресша первее инех узревшая; Радуйся, в вертограде небесном водворившаяся. Радуйся, гроздием Божия благодати ныне непрестанно питающаяся; Радуйся, вином райских радостей веселящаяся. Радуйся, яко твоя любовь к Богу естество победила есть; Радуйся, яко тая и нас ревности Божией научила есть. Радуйся, из уст Христовых вещание Воскресения первее приемшая; Радуйся, Апостолом глаголы радости первее возвестившая. Радуйся, вечную радость на небеси обретшая; Радуйся, яко ты и нас к той радости тобою зовещи. Радуйся, яко о сем о нас к Богу непрестанно ходатайствуещи; Радуйся, яко Тому молитвы о нас тепле приносиши.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 11

Ни едино же слово довлеет воспети по достойно божественную радость Воскресения Христова, юже со иными женами, славная Марие, апостолом возвести в сей нареченный и святыи день, праздников праздник и торжество из торжеств. Темже, пред величием неизреченных щедрот твоих, Христе Царю, на нас бывших, преклоняющеся, со смирением и любовью зовем ти: Аллилуиа.

Икос 11

Светозарная звезда греховному миру явилася еси, Магдалино Марие, егда по славнем Спасове Вознесении, грады и веси преходящи и слово Евангелия всюду возвещаючи, мнози подклонила еси под благое иго Христово. Достигши же даже до древняго Рима, мужески Тиверию кесарю предстала еси и тому образом краснаго яйца и мудрыми словесы живоносную силу Христа уяснила еси, лукаваго же Пилата и безбожнаго архиерея обличила еси, да по беззаконным делом своим достойная примут: таковому подвигу апостольства твоего дивящеся, радостно вопием ти сице:

Радуйся, Христова учения славная благовестительнице; Радуйся, язычския тьмы светозарная прогонительнице. Радуйся, греховныя узы многих человек разрешившая; Радуйся, Христовей мудрости всех научившая. Радуйся, многия люди из тьмы неведения в чудный Христа свет приведшая; Радуйся, образ твердаго стояния за правду Христову нам показавшая. Радуйся, спасение душ грешников паче своея жизни возлюбившая;

Радуйся, заповеди Христовы добре уразумевшая.
Радуйся, тем верно последовавшая; Радуйся, тьму языческую дерзновенно обличившая. Радуйся, гнева кесарева не убоявшаяся; Радуйся, злобу и коварство врагов Христовых тому показавшая.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 12

Благодати от Бога изобильно исполненная, множество душ ко Христу привела еси, славная Марие: по сем же пришла еси во Ефес, идеже апостольски любовью со апостолом любве спасению человек послуживши, блаженным успением ко Господу преставилася еси, емуже ныне с многочисленными небесными певцы непрестанно поеши: Аллилуиа.

Икос 12

Поюще твое достохвальное житие на земли и славу, яже на небеси, радостно славим, поем и величаем дивнаго во святых своих Царя Небеснаго: зане не токмо сама ты, святая Марие, того благодатию, в селениих праведных ныне ликуеши, но и нас веселиши на земли, оставивши нам многоценное миро мощей твоих, яже мудрый Лев-царь, из Ефеса в Константин-град пренести повеле. Тыя и мы, яко источающыя благодать неоскудную всем любовью притекающим, верою и любовью мысленно лобызающе, умильно воспеваем ти таковая:

Радуйся, на земли любовью ко Христу горевшая;
Радуйся, на небеси в райския обители того

вселившаяся. Радуйся, верным твердое заступление; Радуйся, благовонное миро, Церковь благоухающее. Радуйся, кадиланице золотая, фимиам молитвы о нас к Богу непрестанно приносящая; Радуйся, источник исцелений неоскудный. Радуйся, сокровище Божией благодати неизживаемое; Радуйся, ангельских ликом верная соучастнице. Радуйся, небесных чертогов славная жительнице; Радуйся, яко мзда твоя многа есть на небесех. Радуйся, яко радость твоя вечна есть во обителях святых; Радуйся, яко ты и нам пряти радость, благодать же и славу непрестанно ходатайствуеши.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 13

О, пречудное и предивное жен украшение, всем же христианом похвала и радование, Апостолом равная явльшаяся, мироносице славная Магдалино Марие! Нынешнее наше моление приемши, от всяких нас бед и скорбей душевных и телесных и от враг видимых и невидимых, на нас находящих, избави и к Царствию Небесному ходатайством твоим направи всех, со умилением и любовью поющих о тебе Богу: Аллилуиа. (*Трижды.*)

(Этот кондак читается трижды, затем икос 1-й и кондак 1-й)

Икос 1

Ангелов Творец и Господь сил, предуведевый благое произволение твое, святая мироносице, от града Магдалы избра ты, свободив от диавольския сети: ты же по сих верная служительница Господеви явилася

еси, ревнующи о прославлении Его житием и служением. Мы же, чудящися таковому о тебе Божию смотрению, во умилении сердец зовем ти:

Радуйся, от Сына Божия из тьмы диавольския в чудный свет Его призванная; Радуйся, того благодатию телом и духом до конца чиста пребывшая. Радуйся, с чистотою сердца и нищету духовную до конца сохранившая; Радуйся, первее всех воскресшаго Христа узрети сподобившаяся. Радуйся, силу вражию добре победившая; Радуйся, крепкою верою и теплою любовию ко Христу Богу просиявшая. Радуйся, всем сердцем Спаса Христа возлюбившая; Радуйся, верно тому даже до смерти послужившая. Радуйся, душею твоею благодатно обновившаяся; Радуйся, проповедь Евангелия в сокровище сердца своего вместившая. Радуйся, проповедь Воскресения апостолом возвестившая; Радуйся, ангельскою беседою почтенная.

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Кондак 1

Уготованная Господом к равноапостольному служению, святая Марие Магдалино, возлюбленному ти Христу последовала еси; темже песньми с любовию восхваляем тя: ты же, яко имущая дерзновение велие ко Господу, от всяких нас бед молитвами твоими избави, да с радостию непрестанно зовем ти:

Радуйся, святая равноапостольная Марие Магдалино, паче всех благ сладчайшаго Господа Иисуса возлюбившая.

Молитва

О святая мирносице и всехвальная равноапостольная Христова ученице Магдалино Марие! К тебе, яко верней и мощней о нас к Богу ходатаице, мы грешнии и недостойнии ныне усердно прибегаем и в сокрушении сердец наших молимся. Ты в житии твоём страшныя козни бесовския испытала еси, но благодатию Христовою явно от тех свободилася еси. И нас молитвами твоими от сети бесовския избави, да всегда, во всем житии нашем, делом, словом, мыслию и тайными помышленьми сердец наших верно послужим единому святому Владыце, Богу нашему. Ты паче всех благ земных Сладчайшаго Господа Иисуса возлюбила еси и Тому чрез все житие добре последовала еси, божественными учении Его и благодатию душу свою питаючи, и множество человек от тьмы языческаго ко Христа чудному свету приводящи. Сия убо ведуще, молим тя: испроси нам у Христа Бога благодать просвещающую и освящающую нас, да ею осеняеми, в вере и благочестии, в подвизах же любве и самоотвержения преуспевати будем, и ближним служити неленостно потщимся, твоего человеколюбия образ памятующе. Ты, о святая Марие, бодренно благодатию Божиею житие на земли претекши, во обители небесныя радующися отшла еси; моли убо Христа Спаса, да и нас сподобит странствие наше в сей юдоли плача непреткновенно совершити и в мире и покаянии житие наше скончати, да тако во святости на земли поживше, вечныя блаженныя жизни на небеси сподобимся и тамо с тобою и всеми святыми вкупе восхвалим Троицу нераздельную и воспоем едино Божество Отца и Сына и Духа Всесвятаго во веки веков. Аминь.